

La Pancarte Noire de Saint-Martin de Tours, brûlée en 1793, restituée d'après les textes imprimés et manuscrits, Nr. 100

In nomine sanctae et individuae Trinitatis. Karolus <Francorum et Aquitanorum> gratia Dei rex. Si utilitatibus fidelium nostrorum nobis juste supplicantium consulimus, id procul dubio proficere ad statum regni nostri corroborandum fidelitatemque nostrorum cumulandam necnon etiam capessendam felicitatis aeternae beatitudinem minime dubitamus. Idcirco noverit omnium fidelium sanctae Dei Ecclesiae nostrorumque, videlicet tam praesentium quam futurorum, industria quia vir venerabilis fidelis noster, Vivianus comes, innotuit culmini dignitatis nostrae quod quidam levita ex coenobio praeclarissimi confessoris Christi Martini, peculiaris patroni nostri, nomine Adalmannus, quoddam proprium hereditatis suae legaliter contulerit Deo et sancto Martino, quod et pater ejus in vita sua jam egerat, ob emeliorationem sanctae Dei Ecclesiae, tempore scilicet Fridegisi abbatis, deprecatusque fuerit per seriem precariae quandam villulam, nomine Colonicam, ex rebus ejusdem ecclesiae, insuper duos mansellos in villa quae vocatur Vitlena, eo scilicet tenore ut utrasque res diebus vitae suae idem Adalmannus habeat atque possideat, unde censuit in festivitate sanctae Luciae, quae est idus decembris, annis singules se daturum ad illud sepulchrum tres solidos argenti ad luminariam concinnandam, et fratribus sancti Martini quatuor modios vini et octo tritici, addens modo, quatenus merces cumuletur et quod agit firmitus habeatur, duodecim pensas casei. Igitur petiit serenitatem pietatis nostrae, ob amorem et honorem Domini reverentiamque beati Martini, peculiaris patroni nostri, ut hoc ipsum nostra auctoritate dignaremur confirmare more regali. Nos quoque, salubri suggestionem permoti, simul etiam hortatu praefati fidelis nostri Viviani, hoc nostrae auctoritatis praeceptum fieri ac dare decrevimus, per quod constituimus atque perenniter firmum fore decernimus ut, sicut superius dictum est et in serie precariae videtur memoratum beneficium cum omni integritate habeat atque possideat, eo videlicet modo ut annis singulis supradictum censum propria voluntate institutum fratribus sancti Martini solvat, id post suum quoque discessum cuicumque voluerit sub jam dicto censu tenendum relinquat. Unde monemus omnes qui nobis in regno a Deo commisso successuri sunt ut, sicut sua statuta a successoribus suis conservari voluerint, ita in omnibus hanc nostram praecepti auctoritatem super precariam actam confirmandam immutabiliter perpetuis temporibus conservare studeant. Et ut haec nostrae auctoritatis praeceptio firmior habeatur ac per futura tempora melius conservetur inviolataque ab omnibus semper teneatur, eam de anulo nostro insigniri jussimus.

Bartholomaeus notarius ad vicem Hludowici recognovi et subscripsi.

Data XI kal. jul., anno X regnante Karolo glorioso rege, indictione XII. Actum Ausenivilla. In Dei nomine feliciter. Amen.